



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim

tiryimyim@aolima

tir yimyim

TAPAK 8

SCO summit: PM Modi-i Pakistan PM-i  
anga lia kiralongrar indang jembu

Al-Ettifaq manager asütsü  
Steven Gerrard shimogo



VOL. XX NO. 262 (ADOK 262) DIMAPUR RASEMNÜ (WEDNESDAY) CHITENI (JULY) 05, 2023 ₹ 5.00

## Dr. Imliwati nem "Super Doctor" naroküm agütsü



balala nung inyaker Specialist doctor-tem rongnung parnok 32 nem, pei pei mapatem nung tangar asoshia tatishitsü tajung asütsüsa kanga junga inyaketba takok repranteta agüja liasü. Item rongnung Dr. Imliwati Aier-a tajungertem rongnung densemogo.

Dr. Imliwati Aier ya tang Graphic Era Institute of Medical Science, Dehradun nung Senior Consultant aser Critical Care Medicine department nung tokolakba lir.

Pa ya Kanpur nung MBBS renem aser SMS Jaipur nungi MD Anaesthesia agi. Iba sülen Artemis Health Institute Delhi nung "Indian Diploma of Critical Care" azüng. Pa ya mozü ki tulu balala nung inyaka arudang, Nayati Multi-Speciality Hospital, Mathura, UP; Velmed Hospital, Dehradun aser Max Hospital, Dehradun nung COVID-ICU lapoka renemtsüba mapatem nung tongti shilem agiba nüngtugu aser Super specialist medical doctor tajung ka lir. Pa kinungtsüa pa amaji specialist medical doctor tajung ka lir.

**Dimapur, July 04 (TYO) :** Yajang nung Wb.P.Imna Aier aser Wt.Bendangmenla Jamir (Akhoya) na jabaso Dr. Imliwati Aier nem Utrakhand government-i taküm 2023 küm July 01 anogo nung "National Doctors' Day" amungba sentong nung medical doctortem rongnunga Specialist tajungba konang 'Super Doctor' naroküm agütsüogo.

Iba kasa konang naroküm ya Utrakhand state kübok mozü ki

## Frontier Naga Territory nung ESH adentsü jaoker

**Dimapur, July 4, 2023 (Agencies):** Eastern Nagaland Peoples' Organisation (ENPO)-i Kiphire aser Shamator district tem nung aliba Eastern Sumi nung Frontier Naga Territory nung adentsü jaokogo.

Mongulbarnü Hotel Saramati Dimapur nung Eastern Sumi Hoho (Kiphire & Shamator nung Sumi nung) aser ENPO tsüingda külem senden ka amendang Frontier Naga Territory nung adentsü jaok.

ESH-i Frontier Naga Territory nung parnok adentsü jaokba atema shisadangtsü aser iba sülen

tekaraba nung ENPO nem osang agütsütsü.

Iba senden nung mendenji ENPO Vice President Z. Thongshe liasü aser ENPO President Tsapikiu Sangtam-i okila jembu.

ESH-i June 29 nü rally ka ayonga agi aser Chief Minister Neiphu Rio dang parnok Nagaland nung dang adentsü ta shia memorandum ka agüja liasü.

Külen, ENPO President aser General Secretary nati asüng Mon nung Konyak Union den Frontier Naga Territory indang onük lemsateptsü.

## Mizoram Arogoi-i Manipur azütokshi aitsür

**Guwahati, July 4, 2023 (Agencies):** Mizoram Presbyterian church-i Mongulbarnü Manipur nung kin o kin raraba atema teblemstü abenba den takoksa ajurur asoshi aria bilemstüba metetdaktüsü.

Ozüng alema inyaksangshirtemi tanurtem dena tai maketba nisungtem amakba aitsür ta Mizoram arogoi ashi.

"Tebilemstü tamajung aketba aser tamangba yimsü alia amangertemi tesempatsü mapa inyakdang tai maketba nisung taküm aika laluba atema temulung shiranger. Tenlaki, office, pastor quarters aser kiojen aika mitsü küma rongdoktsüogo" ta Mizoram Presbyterian church-i sangdong ka nung ashi.

Tenlaki rongdoktsüba aser

tekülem kitem raksatsüba ya Indian Constitution nung religious freedom temeten agüja aliba alema inyakba lir ta parnokisa ashi.

Mizoram Presbyterian church-isa iba lendong nung taküm samaba kibongtem den asükhu lemsatop aser osettsüset, rongsen aser kiojen samartem asoshi aria bilemstüba metetdaktüsü.

Parnokisa Manipur aser Centre sorkartem dang yimjung aser tesünap bener arutsü atema mapa inyaktüsü ayongzükogo.

Külen, Mizoram nung Joint Committee of Church Leaders-i July 8 aser 9 anogotem Manipur nung tensa süngjemdakjang ta sarasadem sentong ka agitsü ayongzüküka lir.

## Naga Hoho-i Naga yimten melatetba atema nemjema bilemer DGP Rupin Sharma-i UCC atema shisa mebului atatsü ayongzük

**Kohima, July 4, 2023 (TYO):** Naga yimjung olemtep tembanga aser Manipur nung yimjung bener aruba sülen ang Prime Minister Narendra Modi-i aniba sorkar küm 9 abensaba benjung ya among nung tajungba süla ta Naga Hoho-i metetdaktüsü.

Iba olen ya Naga Hoho general secretary K. Elu Nding-i Media Workshop/Vartalap '9 years Seva, Sushasan and Garib Kalyan' nung jembu. Iba sentong ya Press Information Bureau (PIB) Kohima ajanga ayongzüküka agi.

"Asenoki Modi'er sorkar küm 9 abensaba benjung amonger. Iba benjung ya Indo-Naga yimten latetba sülen amonger süra kangasa jungla" ta Nding-isa ashi.

Prime Minister Narendra Modi-i küm 9 tashi sorkar ketdangtsüa aruba atema paisa tenüngsang agütsü.

India sorkari Naga nung teriblemstütem agizüküka inyaktaktsür. Naga nungeri yimten latetsü yongya atar saka iba teimla matonger ta paisa ashi.

India sorkari North East region aser talisa Nagaland tensa

jungjunga asadanger ang Uniform Civil Code (UCC) mapa tenzüktsü asoshi lemtet agitsüla. UCC ya Naga nung mesüra lisopurtem atema tim masü aser lendong ang bentsür arutsü, ta Elu Nding-isa metetdaktüsü.

"BJP sorkari inyaketba atema benjungtep dang asen kidanger Manipur state indang tensa atema temulung raksar. Iba rara kanga mejungi kümogo anungji India sorkari teka ia nübortem khuret asoshi mapa inyaktüsü ayongzüküka" ta paisa ashi.

Naga nung aser North East nung alirtemi Manipur nung yimjung aser tesünap bener arutsü atema yariteptsü mepishir, ta Nding-isa shisem.

Iba sentong nung Director General of Police Nagaland (DGP) Rupin Sharma-i tongti tesemdanger ka ama shilem agi aser pai Naga nung dang UCC atema shisa mebulutsü ashi.

Nisung shingai UCC indang draft mangu anungji iba mapa tenzüktsü ta tang atemabo ashitsü makok. Ajisüka asenoki UCC nung kechisa maginür jembitsü akok, ta Rupin Sharma-

i ashi.

"UCC indang draft sayaba sülen state sorkari jungjunga shisadangba sülen ang mapa tenzüktsü. Nagaland nung journalists aser media houses-i kulitem aser tebilembatem memeyoktepi ochishia osangtsüsang prokshitsü ayongzüküka" ta paisa ashi.

"Tanü social media ajanga osangtsüsang prokshiba maparen melenshiogo saka social media nung prokshiba osang ajakji shitak masü. Anungji Nagaland media-i Manipur indang tensa osang prokshidang Nagaland nung timtem kecha mataloktsüsa kanga kümdanga prokshitsüla" ta DGP Rupin-isa metetdaktüsü.

Vartalap indang technical sessions nung mendenji PIB Kohima Assistant Director, K. Sonikumar Singh liasü. Iba mapang Agriculture Department Joint Director Ketsukha Kath-i CSS Schemes aser Information Technology & Communication Senior Programme Officer Samuel Terieng-i departmental activities indang lemsatop.

## Chümoukedima lendong nung nisung 2 asü; gari 4 raksa



**Chümoukedima, July 4, 2023 (TYO):** Chümoukedima district kübok National Highway-29 nung check gate tejenba anasa tenemlen nung lung anenzüküka aludang nisung 2 asü aser gari pezü raksatsü.

Mongulbar nikonngang 5:30 matongdang Chümoukedima Police check gate aser New Chümoukedima Village tsüingda iba lendong atalok.

Iba lendong nung nisung ana asü. Tenaji Khamniungan nung Hav Thanghiu (48 yrs) aser Aor Temjennochet (55 yrs) na ta jangjaogo.

Nukunuking nung Thanghiu ya 3rd NAP (attached to 1st NAP) nungi liasü aser Temjennochet ya Lengrijan nung alir Changki nung.

Iba lendong nungsa nisung asem yirua lir aser parnokji 1. C/N Piming Kham (M/42 yrs) Village - Nukunuking, Noklak P/Add - Diphupar B, 2. Tsoiniu (F/45 yrs) W/O Piming Kham Village - Nukunuking, Noklak P/Add - Diphupar B aser 3. Tilaka Pillai (F/52 yrs) W/O Subramani Pillai Village - Komal PS - Thiruvur, Tamil Nadu P/Add - CHSS Pesei Complex Dimapur.

Tenemlen nungi lung tulutem anenzüküka aludang Kohima tsütsü nungi aruba gari ana nenrepba sülen ano lung tulu kati tanga gari ka dak oa aon. Iba indang video ya lendong atalokba jakdang gari ka indang dashboard camera agi menüngok aser social media balala nung kanga prokshir.

**Tasür kibong shia nem Rs 4 lakh agütsütsü**

Iba lendong atalokba tesem dang "pakala pahar" ta ajar aser mapang shia anentsüh alur aser lung lungzüküka alur, ta Chief Minister Neiphu Rio-i metetdaktüsü.

"Tanü nikonngang 5:00 ako meta Dimapur & Kohima tsüingda National Highway nung lung anenzüküka aludang nisung 2 asü aser 3 yirutsü. Iba tesem dang

'pakala pahar' ta ajar aser mapang shia anentsüh alur o lung anenzüküka alur" ta CM Rio-i Twitter nung ashi.

Sorkari emergency services inyakdar aser yirua alirtem nem medical teyari agütsür. Iba lendong nung asür kibong shia nem Rs 4 lakh teyari agütsütsü, ta Rio-isa ashi.

"State sorkari India sorkar aser NHIDCL den highway ajungalen lendong atalokba tesemtem nung teinyaktüsü maparen inyaktüsü. Asen sensotem taküm kümzüküka ayutsüla. Bangdak agency-i nungdakba safety infrastructure inyaktüsüla" ta paisa metetdaktüsü.

"India nung technology tejakleni aoba aser India sorkar ket nung rongsen aliba ajanga asen sensotem kümzüküka ayutsüba mapa inyaktüsüla" ta CM Rio-isa ashi.

### CHUMUKEDIMA- KOHIMA NH ATEMA METETDAKTSÜR:

"Tzünglu kanga aruba aser tsüngsang-mopung ajanga Chumukedima - Kohima National Highway nung lung/ali anenzüküka alutsü akok anungji public kümzüküka ayutsü mechi nung iba lenmang nung senzüsönong mesüdaktüsü" ta Commissioner of Police Dimapur, Kevithuto Sophie-i taonung metetdaktüsü.

Tanga osang ka magütsü tashi Chumukedima - Kohima NH nung senzürtemi 7th mile CMD junction - Shokhuvi - Pimla -Mhainamtsi - Punglwa- Jharnapani/Medziphema len senzüa atatsü metetdaktüsü, ta Kevithuto-isa ashi.



# Kohima nung media workshop 'Vartalap' ayongzük



Hotel Japfu, Kohima nung July 4, 2023 nü anogo ka media workshop 'Vartalap' sentong agidang tongti tesemdanger Director General of Police, Nagaland, Rupin Sharma, IPS ajanga lokti ayongzükba mapang tangokba noksa nung angur.

**Dimapur, Chiteni/July 04 (TYO):** Anogo ka media workshop 'Vartalap' sentong ka '9 years Seva, Sushasan and GaribKalyan' omen nung ajemdaker Hotel Japfu, Kohima nung July 4, 2023 nü agia liasü.

Iba sentong nung tongti tesemdanger ka ama jembidang Director General of Police, Nagaland, Rupin Sharma, IPS ajanga osangbener ajak ochishia aser tasü ita nübürtem nem osang shidak agütsüsü ayongzükba liasü.

Osangbener temi shinga tsütsüa medeni indang-indanga osang shidak agütsüsü aser tzüzüng-ozüng tsütsü mangatetep madoktsüsa osang tiazü mabentsüla, ta pai ashi.

Manipur tensa indang osangbener osang tiazü mesüra tai meporokshiba atema tenüsang agütsü aser ochi süaka nübürtem asoshi majung süra kanga kumdanga osang prokshitsüla, ta pai ashi.

Osang tasen prokshitsü asoshi social media, audio aser visual media kanga tongtipang lir, saka osang meporokshidang

tejangja metettsüla mesüra jangjashitsüla, ta pai ashi.

Mashi leni meyipzükba mazüngtsüsa ojang shidak aser kumdanga amshitsüla, ta pai ashi.

Sharma-i osangbener dang sorkar indang scheme tem state tezülen aliba tesemtem nung tajungtiba nung awareness agütsüsü ta ashi.

Temesepba mozü achi-ajemba dak sendakba nung pai ajak dang külemi iba tebilemsü koktetsü ayongzükba liasü.

Kohima Press Club indang tongti zülur Atono Tsukru Kense-i tesemdanger tongti ka ama o tatsüka jembidang, Press Information Bureau aser Kohima Press Club tsüngta lungjemer iba ama sentong ayongzükba atema pelaba lemsatepa liasü.

Government of India ajanga scheme balala mapa kuma inyakba atema lai PIB dang pelaba lemsatep aser iba workshop ya ajanga osangbener aser nübürtem asoshi tongtipang sapang agütsüsü imlar, ta lai ashi.

Tetushi tesemdanger General Secretary, K. Elu

Nadang-ia iba ama sentong nung shilem agitsü maongka agütsüba atema pelaba lemsatepa liasü.

Nübürtem dak rangloker aser nübürtem indang-indanga ajangzüksüsa India sorkari scheme aser policy balala agütsüba atema pai pelaba lemsatepa liasü.

Iba sülen technical session agiba mapang shisalen sayur Jt. Director, Agriculture Department, Ketsukha Kath ajanga 'Overview of CSS Schemes Implemented by Agri Department' onük nung jembi, Jt. Director, Dept. of Employment, Savio Visa-i Department of Employment Skill Development & Entrepreneurship ajanga maparen balala inyakba indang jembi aser Sr. Programme Officer, Er. Samuel Teriang aser Programme Officer, Vizoselie Semou nati IT & Communication Department inyakyim indang jembia liasü.

Sentong tetenzüklen DGP ajanga Hotel Japfu nung '9 years Seva, Sushasan and Garib Kalyan' indang mini photo exhibition ka semzükja liasü.

## Engineering aser professional courses atema career counselling agütsüsü

**Dimapur, Chiteni/July 04 (TYO):** Directorate of Technical Education ajanga sangdong ka nung ashiba agi, kaketshir shirnoksa NEET/NSEE/JEE (Main)-2023 agütsür/ Class 12 (Science Stream) pass sür Engineering / Paramedical /BBA/MBA/ Degree nung Professional course aginer, parnok nem Department of Technical Education ajanga Private Institutions nung admission

agitsü atema Career Counselling sentong agütsüsü.

Iba sentong ya Capital Convention Centre, Near New Civil Secretariat, Kohima nung July 6, 2023 anepdang 9:30 ako nungi nikongdang 5:00 ako tashi aser The Four Seasons, Kohima Road, New Police Commissioner Office, Dimapur nung July 7, 2023 anepdang 9:30 ako nungi nikongdang 5:00 ako tashi alitsü.

Professional aser allied

courses agütsüba Empaneled Institutions, Private Engineering Colleges tem nungi arua iba sentong nung shilem agitsü.

Empaneled list of Institutions ya website dtenagaland.org.in nung angutsü.

Department ajanga Science Stream agütsüba college aser school ajunga dang iba sentong nung shilem agitsü aser kaketshirtem yoktsü ayongzükba, ta sangdong ajangasa ashi.



Assam Rifles temi June 4, 2023 nü Chakabama kübük Jessami-Chakabama lenmang nung sen crore 4.80 jenjang Areca Nuts (kozü) ton 40 shi aser sen lakh 75 shi jenjang Burma teak ton 60 shi pua liasü. Item oset ya Jessami nungi Dimapur leni truck pezü nung bener aodang apu.

OFFICE OF THE  
**LANGPANGKONG TZÜKONG MUNG DANG**  
H.Q. Chuchuyimlang - 798614  
Dist. Mokokchung, Nagaland.  
ESTD. 1933

Ref. No. *AMT/Est/20/2023* Date: *29-06-23*

**LTM SANEN LUDEN SENDEN AYONGER**

Tongtipang ken o tuluka jembitsü alinung 7<sup>th</sup> July 2023 (Friday) anogo Sanen Luden Senden anepdang 11 : 00 ako Tzükong Salang HQ Chuchuyimlang nung akatsü ayonger. Anungji Yimtsüng aser Jila ajak nungi Village Council Chairman / President aser Sanen Luden züngsem den Tzükong Advisor Board aser asen Tzükong meyonga Ao Senden Tongror Luden aser Sanen Luden ajak medema arua atentsü metetdaksür.

Külem Tzükong Wadang nung tenzükba :

Sd/- *[Signature]*  
29-06-23

(Wb. MARSANEN IMSONG) (Wb. R. NUKSHI LONGKUMER)  
President LTM Gen. Secy LTM

## National Teachers Award atema tenüng meshir

**Dimapur, Chiteni/July 04 (TYO):** Ministry of Education, Department of School Education & Literacy Order ajanga sangdongba ama, tesayurtemi pei sasa online ajanga nomination agütsüsü atema June 23, 2023 nü lapoka lir aser nomination agütsüsü atema June 15, 2023 tatem asütsü.

National Teachers Award atema tesayurtem regular service küm 10-i melenshitsuogo.

Iba dak sendakba nung tesayur shirnokisa 'quality of

education' tajungba kumdaktsütsü asoshi bendanga agütsür inyaka arua kaketshir takum melenshitsuür temi pei sasa nomination agütsüsüla.

Iba dak sendakba nung tali tejangjaba metettsü asoshi web portal <http://nationalawardstoteachers.education.gov.in> nung angutsü.

Anungji DEOs/Sr. SDEOs/SDEOs ajak dang pei jurisdictions kübok ajak nem metetdaksütsüla, ta sangdong ajanga ashi.



CSR sentong kübok aser SWACHHTA PAKKARODA nung aliba ama Chief General Manager HPCL (Eastern Zone) Mohit Dhawan ajanga Mongulbarnü HPCL outlet Lifeline enterprise 3rd Mile Dimapur nung sanitary napkin vending machine, island for women, aser two-wheelers atema free oil change semzükja liasü.

## EROs, AEROs aser AEOs atema training agütsüsü

**Dimapur, Chiteni/July 04 (TYO):** Chief Electoral Officer, Nagaland ajanga Election Commission of India den lungjemer Electoral Registration Officers (EROs), Assitant Electoral Registration Officers (AEROs) aser Assitant Election Officers (AEOs) tem atema Special Summary Revision of Photo Electoral Rolls w.r.t 01.01.2024 ya qualifying date ama training ka agütsü liasü.

R. Toshimeren Aier, Assistant CEO ajanga iba training ayongzükba nükjidong tongmelang agi rateta ashi aser iba sülen Officiating CEO, Ruokuovituo Khezhe ajanga tarur pela agizükba o jembidang, electoral roll nung tenüng zülüoktsü kanga tongtipang lir, koba Constitution of India indang Article 326 kübok temeden lir, ta ashi.

Paisa Systematic Voters' Education and Electoral Participation (SVEEP) indang Electoral Literacy Clubs (ELC) ama sentong balala kübok school nung tarutsü voters te, college nung vote agütsür tasen aser lanurtem atema ELC, polling stations ajak nung Chunav Pathshala, sorkar department balala nung Voter Awareness Forum (VAF) amala ajanga nübürtem nem tenüng zülüoktsü asoshi awareness agütsüsü tongtipang, ta ashi.

Iba training nung Awa Lorin, Joint CEO ajanga Electoral Rolls nung presentation ka agütsü, R. Toshimeren Aier, Assistant CEO ajanga Special Summary Revision w.r.t. 01.01.2024 as the qualifying date indang presentation agütsü aser Limatila Ozukum, Assitant Programmer, ajanga ERONET indang rateta ashi.

## Directorate of N&RE tesem melenshiogo

**Dimapur, Chiteni/July 04 (TYO):** Directorate of New & Renewable Energy, Kohima indang office Phezoucha Colony, below Civil Secretariat, Kohima, Nagaland leni belenogo, ta sangdong ka ajanga ashi.

Anungji tang nungi tenzükba tsünglanglen agütsü aliba address

nung tongteprateptsü: Director, Directorate of New & Renewable Energy, Below Civil Secretariat, Phezoucha Colony; Nagaland, Kohima - 797004. Website: <https://nre.nagaland.gov.in>. Twitter: NRE Nagaland. Email: [dirdnre-ntl@gmail.com](mailto:dirdnre-ntl@gmail.com)



# SCO summit: PM Modi-i Pakistan PM-i anga lia kiralongrar indang jembibi

**New Delhi, Chiteni/July 4 (Agencies):** Ato Kilonser Narendra Modi-i Mongolbarnü virtual Shanghai Cooperation Organisation (SCO) summit nung Pakistan aija, state policy nung shilem ka ama arrtsü aden kiralongrartem pusemba linüktem anema jenjang agitsü nüngdaker, ta ashi.

Pakistan Ato Kilonser Shehbaz Sharif, Chinese tir Xi Jinping aser Russia tir Vladimir Putin nungeri anga lia, PM Modi-i ashiba agi, kiralongrar aser parnok nem senotsü teyari agütsüba nokdangtsü atema jenjang tapet ka agitsü nüngdaker ta ashi.

Kiralongraba ajanga regional aser alima ajunga nung yimjung

amokmerener, ta PM Modi-i ashiba den item teloktem anema jenjang tapet agitsü asoshi tesendaktep atsülangshitsü ayongzüka liasü.

"Kiralongrar anema asenok longiemer rara aruogo," ta pai ashiba den kiralongrar den raraba mapang kelena masü kelena masü ta malitsüla ta ashi.

Pai Pakistan indang indanga maitüsüka Ato Kilonser yagi kidanger linük ateshia jembibi ta tejangja liasü.

Kiralongrar teloktem nem tejenokdak agütsüba aser arrtsü atema kiralongrarba maparen inyaksü ajungketba asoshi India-i Pakistan aija arudar.

O jembiba mapang OM Modi-isa, alima ajunga nung

chiyongtsü, totzü aser fertilizer agi anüngba indang tekümdangtsü metetdakja liasü.

India presidency kübok virtual summit ayongzüka agiba nung Kazakhstan, Kyrgyzstan, Tajikistan, Uzbekistan aser Iran nungi lenirtemia shilem agia liasü. Shanghai Cooperation Organization ya, anüolen aliba linüktem nem telangzüba agütsü asoshi Russia aser China nati ngutetba security telok ka lir.

Iba telok nung Central Asian nungi Kazakhstan, Kyrgyzstan, Tajikistan aser Uzbekistan nungera densema lir. Pakistan iba lokti tentet nung 2017 küm aden aser Iran Mongolbarnü denogo. Maneni Belarus-a adentsü atema atadar.

# India-i Canadian High Commissioner jaok

**New Delhi, Chiteni/July 4 (Agencies):** Khalistani extremists' temi propaganda material ajanga Canada nung India nunger diplomat tem amokmerenba sülen India-i Delhi nung Canadian High Commissioner jaokogo.

Taoba anogo ishika tsüingda social media nung prokshiba banner tem ajanga Canada aser Australia nung India nunger foreign officer tem amokmerenogo. Hardeep Singh Nijjar tepsetba sülen Khalistan pusemba teloktemi parnok inyakyim asüngsashitsü atema nükjidoong aliba ama reprangteter.

Deobarnü San Francisco nung India indang consulate amakba sülen Khalistani teloktemi US dangi India ambassador Singh Sandhu dak rangloker poster ka sayaogo.

Poster tasenba nung Sandhu aser TV Nagendra Prasad, Consul General, Consulate General of India, San Francisco nati Khalistan Tiger Force tekolakba aser kiralongrar Hardeep Singh Nijjar June ita tepsetba nung shilem agi ta shia aitsüogo. India sorkari US nung ketdangsurtem den tongtepratepdar aser parnoki iba ken o nung jenjang tapet agitsü.

Deobar anepdang San Francisco nunga India indang consulate amakba sülen envoy ya jaoka liasü. Ita pongu tsüingda Khalistan pusemertemi iba consulate anaben makogo. Parnoki mezüng March ita iba consulate maka liasü.

Kasa mapang nung Canada-i, India nunger diplomat tem tekümküba kübok toktsütsü tenangzüka agütsüogo.

External Affairs Minister S Jaishankar-i, Canada, UK aser US amala India den sendaktepa aliba linüktem dang "extremist Khalistani ideology" atema maongka kecha magütsütsü asüngdangba sülen Canada indang Foreign Minister Melanie Joly-i iba tenangzüka agütsü liasü.

Diplomats tem kümzüka toktsütsü atema Canada bendanga agütsür lir ta shia Minister Joly-i, lai linük Vienna Conventions sülen anidaktsü atema bendanga agütsür aliba lemsatepa liasü. "Diplomate tem kümzüka toktsütsü atema Vienna Conventions dak ajemdaker Canada-i iba ken o kanga süoki ia agir," ta lai ashi.

National Investigation Agency (NIA)-i Canada aser US nung India indang mission amakba ya bushisüngdang tenzüko.

# BJP-i state tir tasentem shimogo

**New Delhi, Chiteni/July 4 (Agencies):** BJP-i Mongolbarnü state pezü nung parnok unit indang tir tasen shimogo. Tongtibang state election tem aser 2024 Lok Sabha election magi tsüingda tang iba jenjang agiogo.

Telangana BJP unit tir asütsü G Kishan Reddy, Andhra Pradesh BJP tir asütsü D Purandeshwari, Jharkhand tir mapa abentsü atema taoba CM Babulal Marandi aser Punjab nung state BJP tir asütsü Sunil Jakhar shimogo.

Temetetsü kaji Jakhar ya taoba mapang Punjab indang

Congress tir liasü. Jakhar-i Ahwani Sharma melenogo aser Marandi-i Deepak Prakash melenogo.

BJP-isa, Telangana nung Management Committee mendenbuba mapa abentsü atema Eatala Rajender shimogo.

Iba jenjang agiba ajanga Telangana nung BJP pur inyakyim jangja jangja küm daksütsü asoshi rangloker inyakba sayur, kong party nung densemba tashi tait lenirtem tasentemi BJP tir Bandi Sanjay Kumar anema nokdaka liasü.

Source-i ashiba agi, central sorkar kübok minister tem

melenshiba mapang Kumar ya minister küm daksütsü imlar.

Telangana nung assembly election taküm küm tatemlen agitsü lir.

BJP tir JP Nadda, Union home minister Amit Shah aser general secretary (organisation) B L Santosh nunger lenisüba nung senden aika ayongzüka amenba sülen party yongtsü nung temelenshi aika adoktsü ta jembiba aruogo.

Ato Kilonser Narendra Modi lenisüba nung linük yimtüba nung Council of Ministers senden ka amenba sülen anogo ka lir iba osang ya sangdonga liasü.

	<b>NAGA BAZAR BRANCH</b> Razhu Point, Main Road, Kohima, Nagaland- 797001 Email: vjkohi@bankofbaroda.co.in	<b>SALE NOTICE FOR SALE OF IMMOVABLE PROPERTIES</b> APPENDIX- IV-A [See proviso to Rule 6 (2) & 8 (6)]		
<p>Securitisation and Reconstruction of Financial Assets and Enforcement of Security Interest Act, 2002 aser Security Interest (Enforcement) Rules, 2002 Rule 6 (2) &amp; 8 (6) kübok kioje/alikimong ayoktsüba atema E-Auction Sale Notice agütsür.</p> <p>Teküboklen agütsü aliba sen meyipa agitsü atema Secured Creditor, <b>Bank of Baroda, Naga Bazar Branch</b>-i ket nung mortgaged/charged süa aliba tekübok agütsü aliba kiojen/alikimong tem ya <b>Bank of Baroda, Naga Bazar Branch</b>, Secured Creditor Guarantor (s) Authorised Officer-i kodang koma yokner ayoktsü ta nübürtem aser talisa sen apur aser Guarantor (s) tem nem metetdaksür.</p> <p>Borrower/s / Guarantor/s / Secured Asset/s / Dues / Reserve Price / e-Auction date &amp; Time, EMD aser Bid Increase Amount tem indang osang tejangja teküboklen agütsü lir:-</p> <p><b>Status of Possession:</b> Constructive</p> <p><b>Property Inspection date &amp; Time:</b> 11.08.2023 &amp; 10:30 AM to 4:00 PM</p> <p><b>Total Dues:</b> 21.02.2022 nung tashi nung Rs. 27,49,616.00 (Twenty Seven Lacs Forty Nine Thousand Six Hundred Sixteen only) aser iba den tetemlok aser tanga charges tem densema lir.</p>				
Sl. No.	Name & address of Borrower/s / Gurator/s	Detailed description of the immovable property with known encumbrances	Date & Time of E-Auction	Reserve Price, EMD amount, Bid Increase Amount.
1	<p><b>1. M/S. ACME CONSTRUCTION (BORROWER)</b> Proprietor: Sri Vesato Theluo, S/o Late Phuzuhu Theluo, R/o Old Ministers Hill, H/No. OMH/C/10, Near School of Music, P.O. Box No. 83, Dist.- Kohima, Nagaland- 797001</p> <p><b>2. MR. WETSO MERO</b> S/o Khotso Mero, M/s. Bible House, NST Taxi Stand, Opposite Bank of Baroda, Kohima, Nagaland- 797001</p>	<p>All that part and parcel of property under Patta No.8516 (New), Plot No.5631 measuring 4450 sq. ft. located at Khruchiezhu Jotsoma, T. Khel, Model Village, Kohima, Nagaland in the name of Vesato Theluo.</p> <p>Boundary: North: Nagi Clan, South: Sekhose Clan, East: Approach Road, West: Jotsoma Village Land.</p>	18.08.2023 1:00 pm to 3:00 pm	Rs. 2,70,00,000.00 Rs.27,00,000.00 Rs.50,000.00
<p>Yokyatsüyatsü aliba atema terms aser conditions indang osang tejangja agitsü asoshi <a href="https://www.bankofbaroda.in/e-auction.htm">https://www.bankofbaroda.in/e-auction.htm</a> and <a href="https://ibapi.in">https://ibapi.in</a> nung agütsü aliba link repringdangang.</p> <p>Date: 05.07.2023 Place: Kohima</p> <p style="text-align: right;"><b>Authorised Officer</b> Bank of Baroda, Naga Bazar Branch</p>				

	<b>NAGA BAZAR BRANCH</b> Razhu Point, Main Road, Kohima, Nagaland- 797001 Email: vjkohi@bankofbaroda.co.in	<b>SALE NOTICE FOR SALE OF IMMOVABLE PROPERTIES</b> APPENDIX- IV-A [See proviso to Rule 6 (2) & 8 (6)]		
<p>Securitisation and Reconstruction of Financial Assets and Enforcement of Security Interest Act, 2002 aser Security Interest (Enforcement) Rules, 2002 Rule 6 (2) &amp; 8 (6) kübok kioje/alikimong ayoktsüba atema E-Auction Sale Notice agütsür.</p> <p>Teküboklen agütsü aliba sen meyipa agitsü atema Secured Creditor, <b>Bank of Baroda, Naga Bazar Branch</b> ket nung mortgaged/charged süa aliba tekübok agütsü aliba kiojen/alikimong tem ya <b>Bank of Baroda, Naga Bazar Branch</b>, Secured Creditor Guarantor (s) Authorised Officer-i kodang koma yokner ayoktsü ta nübürtem aser talisa sen apur aser Guarantor (s) tem nem metetdaksür.</p> <p>Borrower/s / Guarantor/s / Secured Asset/s / Dues / Reserve Price / e-Auction date &amp; Time, EMD aser Bid Increase Amount tem indang osang tejangja teküboklen agütsü lir:-</p> <p><b>Status of Possession:</b> Constructive</p> <p><b>Property Inspection date &amp; Time:</b> 11.08.2023 &amp; 10:30 AM to 4:00 PM</p> <p><b>Total Dues:</b> 02.02.2022 nü tashi nung Rs.19,00,241.15 (Rupees Nineteen Lacs two Hundred Forty One paise Fifteen only) aser iba den tetemlok aser tanga charges tem densema lir.</p>				
Sl. No.	Name & address of Borrower/s / Gurator/s	Detailed description of the immovable property with known encumbrances	Date & Time of E-Auction	Reserve Price, EMD amount, Bid Increase Amount.
1	<p><b>1. M/S. QUALITY CARE (BORROWER)</b> Proprietor: Sri Vesato Theluo, S/o Late Phuzuhu Theluo, R/o Old Ministers Hill, H/No. OMH/C/10, Near School of Music, P.O. Box No. 83, Dist.- Kohima, Nagaland- 797001</p> <p><b>2. MRS. AVIU THELUO</b> W/o Sri Vesato Theluo, House No. C-10, Old Minister Hill, Rev. Dr. Neillezhu Road, Kohima Post Office, Ward No. 14, Kohima, Nagaland- 797001</p>	<p>Equitable mortgage of Land and Building situated at Old Minister's Hill, Kohima, Nagaland, Patta No. 4832(old) Patta No. 6309(new), Plot No. 2031 (v), Area 1506 sq.ft</p> <p>Boundary: East: Foot Step/Road, South: Govt. Quarter, West: Govt. Quarter North: Lt. Rev. Dr. Neillezhu Usuo</p>	18.08.2023 1:00 pm to 3:00 pm	Rs. 1,40,00,000.00 Rs.14,00,000.00 Rs.50,000.00
<p>Yokyatsüyatsü aliba atema terms aser conditions indang osang tejangja agitsü asoshi <a href="https://www.bankofbaroda.in/e-auction.htm">https://www.bankofbaroda.in/e-auction.htm</a> and <a href="https://ibapi.in">https://ibapi.in</a> nung agütsü aliba link repringdangang.</p> <p>Date: 05.07.2023 Place: Kohima</p> <p style="text-align: right;"><b>Authorised Officer</b> Bank of Baroda, Naga Bazar Branch</p>				

From No.3  
[ See Regulation-15 (1)(a)]/16(3)  
**DEBTS RECOVERY TRIBUNAL, GUWAHATI**  
Suwarna Bhawan, House No 12, New Town Path, Near Hanuman Mandir, G. S. Road, Ulubari, Guwahati- 781007(Assam)  
Case No:OA/349/2022

**Summons under sub-section (4) of section 19 of the Act, read with sub-rule (2A) of rule 5 of the Debt Recovery Tribunal (Procedure) Rules, 1993.**  
Exh. No.:3307

**HDFC BANK**  
Vs  
**M/S KATOKA ENTERPRISE**

To,  
**(1) M/S KATOKA ENTERPRISE**  
A Proprietorship Firm Rep by Nihoto Katoka Sema @ N Katoky Chophy House No 12 Sema Khel Notun Basti, Near Bethel Prayer House Dimapur Nagaland 797112  
Dimapur, NAGALAND -797112

**(2) NIHOTO KATOKA SEMA @ N KATOKA CHOPHY**  
S O ZEAUSHE NIHOTO CHOPHY HOUSE NO 12 C SEMA KHEL NOTUN BOSTI NEAR BETHEL PRAYER HOUSE DIMAPUR NAGALAND 797112  
DIMAPUR, NAGALAND -797112

**(3) KHEKALI CHOPHY**  
D O ZEAUSHE NIHOTO CHOPHY HOUSE NO 12 C SEMA KHEL NOTUN BOSTI NEAR BETHEL PRAYER HOUSE DIMAPUR NAGALAND 797112  
DIMAPUR, NAGALAND -797112

**SUMMONS**

Hon'ble Presiding Officer /Registrar matsüingda **28/06/2023** nü OA/349/2022 ya benokogo.

Nü dang nungi sentsüh **Rs. 6431486.59/-** (application long with copies of documents etc. annexed) meshitsü atema Act (OA) section 19(4) kübok na anema benoka aliba application dak sendakba nung Tribunal-i summons/notice agütsür

Act kübok section 19, sub- section (4) dak ajemdaker defendant tem nem item tetuyubatem agütsür:

(i) na jaokba sülen anogo semer tsüingda kechiba nai mepeshiba langzütsüla aji metetdaksütsüla;

(ii) Original application nung serial no 3A nung applicant-i shisema aliba alikimong/kiojen dak alia tanga kiojen/alikimongtem indang osang tejangja agütsütsüla;

(iii) Ken o bangdaka aliba mapang Original Application serial no. 3A kübok aliba kiojen/alikimong kecha atema inyaksangshi masütsüla;

(iv) Tribunal nungi temelaba magi-i Original applicati serial no. 3A kübok shisema aliba alikimong/kiojen kecha nai mayoktsü mesüra lease masütsü;

(v) Nai secured assets mesüra tanga kiojen/alikimongtem yoka iba nungi yokzüka sen bank nung lapokaaliba account mesüra item kiojen/alikimongtem indang security interest bena aliba financial institutions nung deposit süra nü khuret asütsü.

Maneni **18/08/2023 nü 10:30 A.M** tashi nung nü dang applicant indang copy ka densema written statement benoktsü tetuyuba agütsür. Tetuyuba sülen manidakra ken o na medeni teletmetba agitsü.

**Iba Tribunal-i kü nem agütsü aliba seal aser tashi dak ajemdaker 09/06/2023 nü iba tetuyuba agütsür.**

Note: Strike out whichever is not applicable.

**Signature of the Officer**  
Authorised to issue summons.  
Registrar  
Debts Recovery Tribunal, GUWAHATI





## TIR YIMYIM YIMOBILEM (EDITORIAL)

DIMAPUR RASEMNÜ, CHITENI (JULY) 05, 2023

### Tila Tajungba

**N**isunger lokti yimya nung lokti tulu süra aiben mayimjemer, anungji kar talila agidang karbo matar. Iba ama timtemji koktettsü atema tang kümteta aliba Nagaland nungi anüdoklen aliba kintem balaka razüka aotsü renemba ya ajak asoshi junger. Aji oda, telok tuluba den külemi aodang khureta aser tagitsüa kasasa lemozüker ser nung , ashiko, nisung karbo mapa mayim, tagitsü mait yimbazüa kazüdang mapang tesüi memetet süitemdakja alitsüa akok. Item tamakok aser tashimaittemji koktettsü atema telok ka agi ana asem küma lemsar pei pei khuret bena inyakba agi meteteteta terenlok mapa aika inyaktettsü. Aji oda, nübener asüyonga tanur shinga kibong maküm tsürabur den dang senteper lira, kodaser kibongji aientsü aser kodaser kibong nung züngsem ajaki kibong khuret metetstü. Ano, asenok nem tangatetba agütsüba tesem kaji, alima nung nütsüng onsaraba nungi timtem adokba nokdangtsü atema nütsüng ajemdaktsütsü nükjidong nung tangatetba agüja sangdongba yimyim nung ashiba ama " Kibong tilaji Tepela kibong" lir. Tetezü nübener kibongji tulu, nütsüng aika anungji aiben ajak nem agütsünüyonga makur aser meimnüyonga meperir. Ibayongji aiben mepelatep adoker. Aji dang masü kibong nung züngsem aika asüba yariji temulungsentsü, taginüba aser tejangraba balala anungji aiben shisa mapeter. Iba amaji yimten, lokti aser arogo nunga ataloker. Iba jagi tanü asüng alima nung tangatetba tesayuba tasen ka lir, aji akok tashi züngsem aika aliba telok tulu agi telok tilala küma lemsar maparen ajak bentetbenteta inyaka aotsü ajungshir. Atangji, telok tulu aliba agi tilala küma lemsatsübaji mangatettep aser meputepba agi masü saka mapa nunga aser tagitsü nunga lokti, arogo aser yimten nung züngsem ajaki kasasa shilem agitettsü aser tongtettsü nükjidong nung telok tila (small group ministry) kümer inyaktsübaji ajungshiteper. Aji oda, tang Nagaland state tia ya reprangdangra tajunglenbo kechalena maka, anülulenang tamajungba aser anüdoklenang tamajungba, asenokbo tajung nung masü saka tamajung nung tokteper amai küm 60 dak tali arur. Atangji, anüdoklen dang nungibo anülulen tia tera tajungba, kechiyong Nagaland yimtiba anülulen lir. Idakji ajak keta lir. Ashiko, iba jagi asütsüa akok, Nagaland nung alir Naga nunger, anüdoklen aser anülulen alir ta kecha mali, government mapa inyakertema 'posting' anülulen dang aginer aser business inyakertema anülulen dang linür. Anüdoklen linüa aser aginüa bilembajibo, ashiko, election mapang dang khen asütsüa akok. Aji oda, taaktsüka aser tejashitsüka Nagaland yimtiba anülulen nungi anüdokleni aoba Mon aser Tuensang lenmang nung tang tashi apu meyanglutetba agi nübortem akoksaba angur. Kena tia junga anüdoklen nungi Longlengi aoba lenmangbo yangluogo. Ajisüaka, anülulen tenemtsüng lenmang meyanglutetba ajanga Naga nunger mapang aser rongsen amshiba nung takoksa tulu angubaji tang tashi Kohima nung alirtemi merajemteter. Tang ama Nagaland ajungtsü atema bilemba shisatsü, mangdang aser sentong agi anungba mapang, Nagaland tajungba ka asoshi Nagaland agi ana küma lemdanger anepalutsü tenzüksübaji tensa agi aser asenok jakla yimya agia akanger. Aji oda, kodang khureta aser tagitsüa pei pei tsüda lemozükdir, idangjiang katia ka dang meimlateptsü aser temulung melemia mebilemstü. Idangjibo, junga inyakra pei nüngsang asütsü aser junga meinyaktet nunga tamakok aser aser nüngsenji pei meyong akümstü. Tangbo Nagaland tilaka yagi tuluka ama küma anüdoklen alirtemi anülulen alirtem nüng asener aser anülulen alirtemi anüdoklen alirtem nüng asener ta Naga nungertem rongnung tajung inyakba agi kati ka nüng sangteper masü saka nüng senteper. Nagaland tamakokji aji lir. Atangji, Nagaland nungi state balaka razüka mouaka, yimteni inyaktsüba ketdangsuba aser terenlok mapatem ajak amato benzüka bener aoer asünungji mapa agibo Nagaland anüdoklen alirtem asoshi state balaka agütsür amai asütsü. Ibai ajak atema osang tajung lir. Ajisüaka, talisa, Nagaland anüdoklen alirtem asoshiho temoatsü o khurtet na prongla kasasa tululu benloker asütsü.

## OLEMSABANG

### YASHI ASER TANÜ TETSÜR OTSÜREN

~ P.Renthy Jamir

*(Maneni yashi adok nungi...)*

Tetsürtemi mapa tulu inyakteter America nung tanak nisungtem nüchi tia mangu yimdong nung Bus nung mener senzür seat nung amentsü memela. Taabo meshir saka seat magütsür ta aliba kenü Mrs.Parks Bus nung mena alidang temesüng nisung ka atur tesüleni luang ta ashi.(Niggers move back) saka lai la menden maitsü .Iba nungi tenzüka America lima ajaklen rongrong tulu adok.La tasü tait ajanga temelenshi bener arua lar nübur temeden angu.Tetsüri temeim mapa tulu inyakba alima nung tular tilar takar sensaker ajak balalular England Chuba akümsang Charles aser tebuttsü Lady Diana tenata bala .Ano alima nung takatiba Bill Gates aser tebuttsü Melinda tenata yashiang bala 3-5-2021 yamajisa alima nung takar tetsüdi Jeff Bezos aser kinungtsü Mackenzie Scott tenata balaa rongsen ajak lemdang>Saka kinungtsübo balar la rongsenji billions of dollars sensakernem teyari agütsür ( world Philanthropist most influencid ) ta ashir. Tanü asen putu nung tongpang tesashibaji drugs war lir. Iba timtem agi matongba lima shianga mali America Governmenti drone aser helicopter balala amshia nisung taküm jenti lalua inyaker saka menokdangteter.Kin ajaki merangteper saka kecha kinia mokoker.aser tashi temeteter lima aik nung iba atema tendanga inyakdangba nung parnoki yamai ashir.lanur drug lar akümba anema raratsü hadir tajungtibaji tetsütem ta ashir.(Mom The best weapon against teen drug abuse) Iba ya England, Ireland , Italy Germany Netherland limatem nung mozülar 4000 tendangba nungi bushitet ta ashir .Parnok ya kibong nung tetsü sür mesüra balai or alir chirtem teimba ta ashir.Tetsüi mesayuba chirtem noklang nung 44 per centi drug achir, yi ajemer saka tetsüi junga sayuba Chirtembo 16 per centi dang drugs achir yi ajemer ta ashir alima teraksa anema raratsü tetsüjisa hadir tulutiba , anungji alima nung tongpang tesashi akoker tulutiba Napoleon pa Englang nunger kabu nung St Helena nung puoka alidang shisa bulu agi shiranga alidang (depression) England government dang ashitsü melena tetsü temeimla dang pa atema Doctor ka melentsütsü aser Chaplain ana yoktsü ashi pa 5-5-1821 asü.Tang Manipur state nung mozülar lanur 44000 tema lir ta ashir kechiyong iba mim mozü ya par lima yalayashia angur.Anungji mozü ayoker tetsüdi ajakji Manipur nunger teimba lir.Joko kecha governmentia ya nokdangtsü makoker aser alima telungi alur. Iba timtem ajiteta Manipur nung tetsür telok tentet tulu ka lir, koba dang MEIRA PAIBI ta ajar . Item tetsür telok yagi mozü ayokertem aser tachirtem bushia tim lenmang tuyua azüoker ta ashir. Nagaland nunga drugs achir 30000 shi lir. Yangji Sen crore 550 shi entoker. Asen Ao lima nunga joko küm aika yi tongpang raraba aser mozü achirtem nokdangba ajak nung Watsü teloki shilem tulutiba agia arur.Parnoki aiben anibelem arema mapa inyaker

parnok meteniang administration aser yimdak yimsüsür Town Committee membortem mapa jeta bener moteter.Tangar Town aser yimtsüngtem inyakyimtemji toktsür onok town nungbo tetenzükdang nungi tanü tashi nung yamala maparen inyakba ajak nung watsü teloki parnok lenir sür inyaker, yi tongpang aser mozülar atema dang masü lokti maparen ajak nung administratortemi parnok tama jaoker.Ano Election mapang political partytem kwiben jaoker Watsü telok meteniang mesenteper. Lai nung ashiba ataloka tanü joko tebur lokti dang nungi tetsür telok tashi tuluba akümer tetsür telok tulu temeranger chubatem ajener T.K 68-11.Aser tetsürtemi teburtem kümzüker Yer 31-22.

O tembang tanü India nung Nagaland nung joko teburtemi tetsürtem kecha nunga memeneper. Education tsütsü reprangdangra school level nungi university tashi nung examination ajak nung top position tetsür teimba UPSC, NPSC tatidang ajak nung tetsür teimba takum UPSC nung Naga nunger 4 passed tetsür 3 tebur ka sports tsütsü asadangra international level nung tetsürtemi Mary Kom, Sania Mirza nungeri ama teburtemi takok marok bener maruteter. Naga lima Ao lima arogotem nung tetsürtemi tajungba sayutsüngir. Kena parnoki tajungba atener . Item ajak dak alaka Tanela Temeshi ia tebur dang nungi tetsür nübu teimba amshir Shiner mangdang .Anüng ali meyipteptsü Shiti agi Mesü akümstü Mesü agi Shiti akümstü.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**



## Plateau State, Nigeria nung tamanger 11 tepset

**Abuja, Chiteni/July 04 (Agencies):** Taoba hopta Plateau state, Nigeria nung Fulani shiruru metsür tem aser danga kiralongrar temi Khristanpur nisung 11 tepset aser anasa aliba Taraba state nunga nisung 20 tepseta liasü.

Plateau state nung Khristanpur timba aliba yimtsüngtem nung tanen makai amaker aser Muslim kiralongrar aser shiruru metsürtemi June 27, 2023 nü Mazat village, Barkin Ladi County nung Khristan aluyimer aser iba yimtsüng nung lenir ka khaset, ta Emancipation Centre for Crisis Victims in Nigeria (ECCV) indang coordinator Dalyop Solomon Mwantiri-i ashi.

"Pa ya par alu nung mapa inyaka alidang anepdang 8:35 ako meta tepset," ta Mwantiri-i Morning Star News dang sangdong ka ajanga ashi.

Kasa anogo kiralongrar temi Riyom County nung Wereng-Camp yimtsüng amak aser Khristanpur ana tepset, ta pai ashi. Parnoki anasa aliba yimtsüngtema amak.

"Parnoki Wereng yimtsüng ya nikongdang 7:00 ako meta amak aser yangji tamanger ana, Chuwang Boyi aser Amos Dung tepset. Kasa lendong nung tamanger ana yirua liasü. Tahoss yimtsüng nung alir tamanger Bulus Bakwet-a mita atar nok agi alep," ta Mwantiri-i ashi.

Bakwet ya Jos anasa Vom Christian Hospital nung temang anepaluba mapang lir.

"Iba ama lendong ya anogoshi amai ataloker aser kiralongrar aser Fulani shiruru metsürtemi Khristanpur samatsüsü meranger. Khristanpur tepsetba dang

masü, parnok meyong alu nung yoka aliba chiyongtsü raksatsür, aser ibai Khristanpur tim temdaksütsü nükjidong nung inyaker dang lir," ta pai ashi.

Mangu County nung shiruru metsürtem aser danga kiralongrar temi June 26 nü Khristanpur timba aliba Kerang yimtsüng amak aser tamanger pongu tepset, ta yangji aliba pastor kati ashi.

"Asürtem ya Church of Christ in Nations (COCIN) züngsemtem lir aser asürtem rongnung apuani densema lir. Kiralongrar temi iba yimtsüng ya nikongdang 5:00 ako aser 8:00 ako tsüngta amak," ta Christian Association of Nigeria (CAN) indang Mangu Local Government Area Chapter mendenpuba Rev. Timothy Daluk-i ashi.

Tanjol village, Riyom County nung Fulani kiralongrar aser bandits temi June 23 nü Khristanpur asem tepset aser ana yirua, ta yangji alir Rwang Tengwong-i ashi.

Anasa aliba Taraba state nung Fulani shiruru metsürtem aser danga kiralongrar temi June 25 nü Takum jila nung Khristanpur 20 tepset. Iba tesem nungya taoba küm ana tsüngta Khristanpur taküm 200 agiogo aser ki 5,000 raksatsüogo, ta osang ajanga ashir.

"Ozü nürburtem kiralongrar aser shiruru metsür tawapangba kübok aliba ya osang ka masü. Takum Local Government Area amala tesemtem ya teti amaker aser ibaji ajanga takum aser ki o jen samatsür," ta CAN indang Taraba State Chapter mendenpuba Rev. Isaiah Magaji Jirapye-i ashi.

Tarutsü nung iba ama lendong nungi nokdangtsü asoshi sorkari tekeraba nung mera agitsüla, ta CAN Taraba chapter ajanga ayongzük.

"Tensa azüoktsü mechi lendong ajurua aliba tesem nung kinük-kisang ajakleni sepaitem yoktsü ajungshir. Tangya aluyimerem alu nung oa nokdaker mapa inyaktüsü mapang lir, saka parnok takum kumzüktsü mechi atsükshia senzür," ta Pastor Jirapye-i ashi.

"Khristanpur ajunga dang apudaker nüktzü yima ozü lima nung Tsüngrem taochi sayuang ta sarasademtsü ajungshir."

Takum Local Government Council nung mendenpuba Boyi Manja-i ashiba agi, shiruru metsürtem aser danga kiralongrar temi küm ana tashi onok aliba tesem amakba manener.

"Mapang tatsüka tsüngta item kiralongrar temi ozü nübur 200 dak tema takum samaogo. Item kiralongrar temi ki 5000 dak tema raksatsü," ta Manja-i ashi.

Taraba State House of Assembly nung iba kin nungi Khristanpur legislator trok-i sangdong ka nung lendong agütsüba jangja ashi aser mitkar aser police tem tekeratiba nung yoktsü ajungshia liasü.

Taraba State Police Command-ia lendong atalokba indang shiogo aser item tesemtem nung police aser mitkartem yoka lir ta ashi.

Open Doors ajanga alima nung Khristanpur alitsü asoshi tamajungtiba linük 50 asadanga 2023 World Watch List nung Nigeria ya jenjang trok buba nung lir, koba taoba küm jenjang tenet buba nung liasü.

## SoCal Harvest Crusade nung nisung meyririjang aika aden

**Anaheim, Chiteni/July 04 (Agencies):** Taküm Honda Center nung hopta tatemen aonung ana atema ayongzükba SoCal Harvest Crusade nung nisung meyririjang aikati Yisu Khrista nem takum bendanga agüja liasü.

Iba sentong ayongzükba tesem nung nisung 16,000 adenshi aser alima tesem balala nungi iba crusade ya online nung nisung 47,000 dak temai repranga liasü.

Harvest Christian Fellowship indang senior Pastor Greg Laurie-i iba sentong ya küm 34 tashi ayongzüka arur aser alima tesem ajungalen Crusade ya 121 ben kaogo.

"Onoki nisung million trok dak tema dang osang tajung live nung sayutetogo aser nisung 600,000 dak temai tamangba nung mapa inyakba nguogo," ta

pai iba sentong indang tweet ka asü.

Taküm iba sentong ya alima tesem ajungalen nungi reprang aser iba mapang Tsüngrem temeim aser tekumtet sempet indang jembia liasü.

"Küm 2000 jakdang Yisu Khrista ya kojai (nails) agi soit masü temeim agi soit. Na meimba yong. Ni meimba yong. Ni taoba mapang ashi ama, Tsüngremi na meimer. Pa na asoshi asü. Alima nung nisungji na kisung asüyongbo Yisui na asoshi kangki nung timtema süla. Aser pa tim atem. Pai na kanga meimer," ta Laurie-i sayutsüngi.

"Langkoshishi lima ka nung osang tamajung agi sünger alidak asenok alir. Alima tamajung nung asenok ajaki osang tajung kar amshitsü tim ta ni angateter," ta pai tweet asü.

Iba sentong nung tekülem aser tetushi mapang ya sempet nga Khristan ken atener Michael W. Smith, Chris Tomlin, Phil Wickham, aser Taya Gaukrodger nungeri ania liasü.

Taoba mapang Harvest Crusades ya Anaheim, California nung aliba Angels Stadium nung agia liasü, saka taküm football asaya mapang asayadak moabu wazüka yunüba ajanga tesem tilabai belentsüsa akum.

Ano maneni Harvest Christian Fellowship ajanga Corona Del Mar, CA nung aliba Pirates Cove nung July 8 nü "Jesus Revolution" church-wide baptism ayongzüktsü.

Iba sentong ya July 9 nü ayongzüktsü sentong yanglua liasü, saka tzü nung baptiner aika akumba ajanga anogo melenshitsüsa akum.

## ANOGO ABEN TSÜNGREM DEN

### Kümzük (T.Ken 116:1-11)

Tenüngsang Ken 116 shibai zülu pa timtem tia kar ajanga aoba iba ken nung zülu. Shitakba nung pa tasür liasü. Saka Kibubai pai ayimtenba angashi aser kümzük, aser iba indang pai zülu, "Ni Kibuba meimer kechiaser Pai kü ola aser kü temepishiba angashia lir, kechiyong Pai kü dangi Pa tenarong shitsür, aji asünung kopika ni taküm lidir ni papikaji ni Pa ajatsü" (t.1,2).

Tsüngremi Pa tila tanur dangi tenarong shitsüba noksa jagi Pai angashitsü asoshi asenok anasai aruba indang sayur. Junga aser jangjaa angashitsü asoshi tangari asenok den jembidang asenoki anasai orr angaa alir. Tsüngremi teti asenoki jembiba angashir, yaritsü asoshi teti asenok anasa alir. Ken züluri asenok dang ashir, "Kibubai tongmelang pur awabanga ayur; ni tajemzükba kümdakja liasü, aser Pai ni kümzük" (t.6). Asenok kümzüktsü asoshi Tsüngremi asenok alidaki arur aser Pai asenok kechi koma südaktsüner yamaji kümdaktsür. "Kechiyong tasü nungi kü taküm, nüktzü ayimba nungi kü nük, aser laoba nungi kü tetsüng nai kümzük" (t.8).

Ken züluri Tsüngrem taochi angu. "Kibuba taochi aka, aser temeshi lir; hau, asen Tsüngrem yimlibilem lir. Kibubai tongmelang pur awabanga ayur; ni tajemzük kümdakja liasü, aser Pai ni kümzük" (t.5,6). Tsüngremi pa tasü nungi kümzük aser pa nüktzü kongdaktsü. Pai tashi itdaktsü aser malangtsü pa tetsüng kümzük.

Asenoka Khrista ajanga iba teyari kar. Paji taochi aser yimlibilem adokdak lir. Ken züluri ashi, "Tasüba lisü agi ni mesangbangogo" (t.3), saka tanela nung pa masü. Yisu pa melena asü.

Na tanü Tsüngremer tekümzükba nungdaker asü? Pai ne dang angashir aser yarir, pelaang. Ne nungdak ajak Pa teperiba teka nungi arur. Pa taochi aser yimlibilem lir. Pa tenung nung jang; Pai na kümzüktsü.

## Wiltshire nung aliba Arogo ka nung summer Christmas carol agi



England nung Wiltshire kübok Monks Chapel Arogo Tenla ki noksa nung angur.

**July 04, 2023:** July 2, 2023

Sadoksadoka Khristmas nikongdang England nung Wiltshire kübok Arogo ka nung summer Christmas carol service ayongzüka agiogo.

Wiltshire kübok Chippenham anasa Monks Chapel Arogoi tesüiba küm ishika parnoki küm shia agia aruba ama mei mapang nung Khristmas carol ayongzüka agiogo.

2010 küm Khristmas mapang nung rür kanga alaba ajanga parnoki Tenla kidangi mouteti liasü, anungji parnoki asükwa mongpu nung tsüngsang majungdang sayatsü atema mei mapang nung Khristmas sentong agiba record süa ayutsü telemtetba agi.

Sadoksadoka Khristmas tekülem sentong agitettsü atema mei mapang süaka Khristmas tekülem sentong agitsü nungdaka liasü, ta Rev. Gary Gotham-i metetdaksü.

"Kecha timtem makai nürburtemi Khristmas sentong nung dennüa liasü," ta pai ashi.

Yaküm mei mapang Khristmas tekülem sentong nung nisung 70 dak tema aden, ta pai ashi.

Taküm Khristmas carol sentong ya Amongnü (July 2) nikongdang 2:45 ako nungi tenzüka agi, aser Tenla kidang Khristmas süngdong den Khristmas benjung sübotsü inoka liasü.



**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Remso**

(n) ajungbena temoatsü anguba (surprise blessing)

\* Tanepbo kidangeri bener yokba **remso** aon den chiyongogo.

**Remtak**

(v) osettsüset aser nisung tejak telong ser ayu mesüra lao

\* Chipu aonpu remtaka alidak pa **remtaka** lao.

**OLONG PAITEP # 6566**

1				2				3		4
5		6								
							7			
8										
										9
		10					11			
				12				13		
14										
							15			
16										

**TIPIEN**

- 2. Auonungchiyongsüasenba
- 5. Mangyimba mapang
- 7. O lamendakdak
- 8. Peidak malangba
- 10. Juli
- 12. Sen ayudak
- 14. Tenük agi ajitet
- 15. Tamajung aküm
- 16. Apuso

**LANGTSÜNGLEN**

- 1. Lenmang
- 2. Aor kidong ka tenüng
- 3. Tenarong maten
- 4. A \_\_\_ g
- 6. Mopung apodoka
- 9. Tonglipang tagitsü
- 10. Menungra bilem
- 11. Aiür
- 13. S \_\_\_ k
- 14. T \_\_\_ r

**OLONG PAITEP # 6565 TELANGZÜBA**

**TIPIEN :**

- 1. Yiar, 3. Tesola, 7. Yimra,
- 8. Tangar, 9. Peria, 10. Tanur,
- 11. Tasen, 13. Lemjem,
- 15. Tambu, 16. Khuret,
- 17. Sang.

**LANGTSÜNGLEN :**

- 1. Yimti, 2. Amen, 4. Shiner,
- 5. Alaka, 6. Satan, 9. Putet,
- 10. Tembar,



**ALOKBA O WARAKLA NA TIA :**

**Warakla** : Tambu, asen kidangser tasenbar ya par tambu office-i taoi teti kiss sürang yoket ati, nai-a yamaji inyaknungbo junglako.




**Alokba** : Nai mashidang yongi ni inyakdang nung, la toagi petinu ajak adoka maoktsüji joko kodanga anaha maor ako.

**Warakla** : Oh Alokhangba!

~ Lilir : WhatsApp

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

**Tripura-i NE nung 'Tuberculosis Free India Campaign' tajungba inyaker**



**Agartala, July 4, 2023**

(Agencies): North Eastern state tem nung Tripura nung Tuberculosis Free India campaign tajungtiba inyaker.

Linük nung state tajungba nung tanabubaji Tripura lir ta Union Ministry indang report nung shia lir. Tripura-i 76 marks angu.

Anogo 21 campaign nung door-to-door case detection agia liasü aser iba mapang healthcare workers-i sputum samples benden aser

sangdong.

Tripura-i National Tuberculosis Eradication Program mapa tajung inyakba atema tenüngsang agütsür ta National Health Mission, Tripura Chapter-ia metetdaksü.

"May 30, 2023 nü Guwahati nung Zonal Task Force senden amendang North-East nung government aser private medical colleges rongnung Tripura-i top performer ngua liasü" ta NHM-isa ashi.

TB India Report 2022 ajanga linük nung state tajungtiba

tanabubaji Tripura ta shiogo aser iba ya nütsüng yongsük lakh 50 teküpok aliba state tem rongnung lir. Sikkim-i tematiba jenjang angu. Iba ajanga Tripura-i 2025 tashi nung tuberculosis samatsütsü alizüng yua aliba atongtsü ama lir.

National Health Mission teyari ajanga Tripura tuberculosis eradication programs tashi itta mapa inyakteter.

2022 küm Tripura nem 'Towards the Progress in TB Free Status' index atema bronze

**July 8nungi Greater Tipraland atema mapa tenzüksü**

**Agartala, July 4, 2023**

(Agencies): Tipra Motha-i July 8 nü Madhab Bari, West District nungi 'Greater Tipraland' atema maparen ka tenzüksü ta Tipra Motha chairman aser chuba jabaso Pradyot Kishore Manikya Debbarma-i metetdaksü.

Anogo ana tejakdang TIPRA Motha lennirtemi Union Home Minister Amit Shah den

ajurutepdang Greater Tipraland takhangba agütsü. 2018 küm IPFT-i aibelenba ama onoki masütsü, ta pai ashi.

Onok takhangba onüktem meinyaki sorkar nung denra tarutsü nung takhangba onüktem magizüksü akok ta Pradyot-i ashi.

"Ni nübortem dang nangzüksü ama inyaksü aser nija ajangzüksü atema

nübortem mashioktsütsü" ta paisa shisem.

July 8 nungi sorkar rongshitsü atema maparen ka tenzüksü. Mezüng atema Madhab Bari nung iba sentong tenzüksü aser Greater Tipraland takhangba agütsütsü, ta paisa metetdaksü.

Asenoki ozüngi melaba ama timi dang lungkak aittsü aser district o block levels nung

**Meghalaya police-i Smit bomb lendong atema SIT tentet**

**Shillong, July 4, 2023**

(Agencies): Hombarnü Lumkynsai, Smit nung bomb lendong atalokba bushisüngdangtsü atema Meghalaya Police-i July 4 nü Special Investigating Team (SIT) ka tentetogo.

"Vivek Syiem SP (City) lenisüba kübok SIT ka tentetogo" ta Superintendent of Police (SP) East Khasi Hills,

Sylvester Nongtynger-i ashi. Iba dak sendakba nung Madanrting Police Station nung Suo-Moto FIR ka benokogo, ta SP Nongtynger-isa ashi.

Ajisüaka pai bomb apokba indang olen kecha mashi aser SIT-i bushisüngdang tembangba sülen ang osang metetdaksütsü ta dang ashi.

Smit nung aliba ki ka nung bomb tesashi ka apok aser idangji Pynsuklang Khongwir ta nisung ka pokset.

Iba apokba ya "electric mattress" apokba liasü ta osang prokshia liasü saka SP Nongtynger-ibo bomb apokba kuli kar ngutetogo ta ashi.

Bomb Squad team aser CSU team-i bomb apokba kuli bushitepdar.



Mizoram Governor aser Indian Red Cross Society (IRCS) president Dr Hari Babu Kambhampati-i Raj Bhavan nung Health Department ketdangsurtem aser züngsemtem den senden ka amenba angur. Iba mapang Governor Dr Hari-i IRCS-Mizoram Chapter dang shilem tuluba agitsü ayongzük aser Principal Secretary, Health Department Esther Lal Ruatkimi-i PowerPoint presentation ka ajanga IRCS-Mizoram Chapter inyaksangshi lemsatop.



Temerenshi agütsüba agi Russia tashi taitba akumer: Putin



**New Delhi, Chiteni/July 04 (Agencies):** Moscow-i Ukraine amakba sülen Russia-i Western sanction tem anema maneni nokdaksü, ta Tir Vladimir Putin-i ashi.

Virtual yimya nung Shanghai Cooperation Organisation summit nung pai jembiba ya taoba ita Russia nung yimsüsür anema sepaitemi longkak aiter mezüngbuba senden alitsü.

SCO linüktem tsüngta 'local currencies' nung shishilempatsü züngzüktepba Putin-i bukuma liasü, koba temerenshi agi kangabo mokongshidaksütsü merangba amai ajiteter.

2023 SCO senden ya virtual yimya nung India lenisüba kübok agitagi.

Putin-i iba sapang amshia West-i ashi mangai inyakba sayua "Bendanglen nungi temerenshi agütsüba, ajungshiba aser rara mesüba anema Russia nokdaker aser kodanga majangshidangba ama maneni renloker," ta ashi.

Wagner mercenary group ajanga June ita tatemlen sorkar anema mapang tatsüka longkak aitba sülen Putin yimjak nung aiben nguogo, saka linük balala nungi lenirtem den bo tang mezüngbuba lir.

"Constitutional inyakyim aser takum aser nürburtem security kumzüka ayutsü mechi Russia lenirtemi inyakba bukuma nokdakra atema SCO linüktem nungi külem tenzüker dang pelar," ta pai iba senden nung Kremlin, Moscow nungi ashi.

China aser Russia nunger tsüngta shishilempaba shilem 80 dak tema roubles (Russia nunger sen) aser yuan (China nunger sen) nung lir, aser SCO züngsemtem dang kasaji inyaksü ajungshir, ta Putin-i ashi.

Russia tembar linük Belarus taruba küm SCO nung teti asoshi züngsem akumtsü asüngdangba atema pai pela agizüka liasü.

Iba senden ayonger India Ato Kilonser Narendra Modi-i

zungsemtem dang shishilempaba, connectivity aser technology tsütsü amalitep akatsü ayongzüka liasü.

Ajisüaka pai Ukraine nung rara mesüra Indo-Pacific nung China tali temolung ulushia nokdakba indang mejembi. India ya akhi mapang nungi telok ka dena maden aser West den tesendaktep nung tali tashi aitba ajanga kanga kumdanga inyaksangshir.

Anogo ishika tejakdang Modi-i Washington semdang dang kanga tushia agizüka liasü.

Modi-i regional security indang jembidang China tenüng mamshi, koba mapang talangka nungi India den tesendaktep mejungi arur.

Region nung West ainba ajemdaksütsü nükjidong nung SCO ya 2001 küm China, Russia aser Central Asia nungi linük pezüi tenteta liasü. India aser Pakistan 2017 küm aden.

BRICS (Brazil, Russia, India, China and South Africa), G20 aser G7 ama tali tejangjaba tentet tem liaka SCO nung tashi lir.

Alima nütsüng yongsük shilem 40 shi SCO nung lir aser alima indang GDP shilem 20 dak tema lir. Yangji Iran densemra alima nung aliba totzü shilem 20 shi par meyong asütsü. Iran ya taküm senden nung SCO indang züngsem kumdaksütsü.

Taliban-i Afghanistan nung hair & beauty salon tem shibangtsü tuyu

**Kabul, Chiteni/July 04 (Agencies):** Taliban-i Afghanistan nung 'hair and beauty salon' tem shibangtsü totuyuba agütsüogo, koba tetsürtem nem tenokdangba balala agütsüba rongnung tasenba alitsü.

Vice and Virtue Ministry odongtar kati ashiba agi, ita ka tsüngta iba totuyuba sülen anidaksüla aser July 2 nungi tenzüksü.

2021 küm Taliban yimsüsüba arur tetsür temeden tanem tanemi ajak samaa aor.

Parnoki tetsürtem classrooms, gyms aser parks temi maotsü nokdang aser tawa parnok United Nations atema meinyaksü tenokdangba agüja liasü.

Taliban-isa tetsürtem tenük dang ngua süoshi agitsüla aser kilometre 72 dak tema senzütsü süra kinunger tebur ka adentsüla, ta totuyuba agüja liasü.

Alimai ajaka aser tetsürtem aser ano activist temi parnok tenüng nung jembiba tenokdangba maneni agütsü.

1996 aser 2001 tsüngta Taliban temi tesüsa yimsü asüba mapanga tenokdangba

balala agütsüba nung beauty salon tem shibangtsüba densema liasü. Saka 2001 küm US-i anir Afghanistan amakba sülen tanaben lapoka liasü.

Tang iba tenokdangba agütsüba anema jembidang Afghan tsür kati "Taliban temi Afghan tsür nungi meimchir temeden ajak bener aor," ta ashi.

"Parnoki tetsürtem temeden nung aibelener. Iba telemtetba yagi tangbo tetsür temi tetsürtem tenzüka nokdang. Iba osang angashidang ni kanga aoksa," ta lai ashi.

"Tetsür temang nung ranglokba dak alaka Taliban tem dang yimtenren sentong kecha mali amai ajiteter. Yimjak nungi parnok tetsür samadaksütsü meranger."

US sepaitem ainshiba sülen küm ana tejakdang Taliban-i tanaben yimsü asü tenzüker beauty salon tem lapoka liasü. Saka dokan indang kijiba aiben shibang aser salon kima tetsür noksa tem tejak nembanga sentsü balala nülokja liasü.

Taliban sorkari iba tenokdangba agütsüba atema rasaa mashi, mesüra temelen inyaksü indanga kecha mashi.

Turkey aser Egypt tesendaktep yanglushitsü atema ambassador shim

**Ankara, Chiteni/July 4 (Agencies):** Turkey aser Egypt nati diplomatic jenjang tematiba nung linük ana tsüngda diplomatic tesendaktep yanglushitsü atema ambassador tem shimogo.

Turkish foreign ministry-i Mongolbarnü külem sangdong ka lemstepba nung Cairo aser Ankara nati ashiba agi, Turkey-i Cairo dangi ambassador yoktsü Salih Mutlu shimogo aser Egypt-i Ankara dang ambassador yoktsü atema Amr Elhamamy shimogo, ta ashi.

"Linük ana tir-i telemtetba agiba dak ajemdaker linük ana tsüngda diplomatic tesendaktep jenjang ajungketshitsü atema jenjang agiogo," ta kasa sangdong ajanga metetdaksü.

"Linük ana tsüngda tesendaktep tanaben yanglushitsü aser Turkey aser Egypt nunger ajangzükdaksütsü atema bilateral tesendaktep tajungba küma yanglushitsü atema arok tejangrabatem asadangtsü asoshi iba jenjang agiogo."

Egypt tir Abdel Fattah el-Sisi-i anir 2013 küm sorkar cope süa iba mapang tir Mohamed Morsi (taoba mapang Muslim Brotherhood lenir) atsiungtokba sülen Cairo aser Ankara na tsüngda tesendaktep mejungi aküm.

Morsi, shiba linük nung mezüngbuba nürburtemi shimba tir liasü, pa ya Turkey lenir Recep Tayyip Erdogan aser pa

aniba conservative Justice and Development Party (AKP)-i pusema liasü, koba Muslim Brotherhood den kanga junga sendaktepa lir.

Istanbul indang Kultur University nung international relations professor Mensur Akgun-i ashiba agi, 2013 küm cope sülen linük ana tsüngda nüngdak makaba nung tesendaktep raksa liasü aser talisa Ankara-i Sisi sorkar anema nokdangba ajanga lir, shiba 2014 küm tir küma liasü.

"Linük ana tsüngda yimden yimsüsüba dak sendakba nung sensaksem küm ishika tejakdang anena liasü aser tang ambassador jenjang nung tesendaktep yanglushiba ajanga linük anapronglai yimden yimsüsüba tsütsü tanaben sensaksemtsü atema renema aliba sayur," ta pai Al Jazeera dang ashi.

"Linük anapronglai pei aginüba ama kati ka memelenshidaksütettsü ta angateta aru asütsü ta bilemer. Iba tesem nung linük anaprongla tejangraba kümsüka ayutsü atema tangatettep ka dangi aru asütsü," ta Akgun-i shisem.

2013 küm nungi tenzüka linük ana tsüngda ken o balala nung mangatettep adoka aruogo aser lenirtemi yimjak nung kati ka aitsütepa aruogo, ajisüaka 2020s nung tesendaktep yanglushitsü atema jenjang agia liasü.

(Maneni tapak 8 nung...)

**GOVERNMENT OF NAGALAND**  
**DIRECTORATE OF SCHOOL EDUCATION**  
**KOHIMA : NAGALAND**  
*NO. ED/AEI-25/2021 Dated Kohima, the 3rd July 2023.*

**NOTIFICATION**

In pursuance of Ministry of Education, Department of School Education & Literacy Order No. F 1-23/2023-NAT dated 23rd June, 2023, the web portal for online self-nomination by teachers is open from 23-06-2023 and last date of submission is 15-07-2023. The condition of eligibility of teachers for consideration of National Teachers Award is revised to 10 years regular service.

In this regard, teachers who have contributed for the improvement of quality of education through their commitment and industry and also enriched the lives of their students can submit self-nominate themselves before the prescribed last date of submission. Further details may be obtained from th3w web portal <http://nationalawardstoteachers.education.gov.in>.

Hence, all DEOs/Sr. SDEOs/SDEOs are requested to ensure wide publicity in their respective jurisdictions.

**(THAVASEELAN K) IAS**  
Principal Director

**GOVERNMENT OF NAGALAND**  
**DIRECTORATE OF TECHNICAL EDUCATION**  
**NAGALAND: KOHIMA**  
*No. DTE/CON-INST/1/2016-17(PT) Kohima, the 3rd July 2023*

**NOTIFICATION**

This is to inform students who have appeared NEET/NSEE/JEE (Main)-2023/ passed class 12 (Science Stream) and wishes to pursue studies in Engineering/Paramedical/BBA/MBA/Degree in Professional courses, the Department of Technical Education is organizing CAREER COUNSELLING EVENT for admission to Private Institutions on 6th July 2023 at Kohima and 7th July 2023 at Dimapur.

Empaneled Institutions, Private Engineering Colleges offering professional and allied courses will be deliberating minutely on career prospects at the counselling event empaneled. (Empaneled list of Institutions can be accessed from the website [denagaland.org.in](http://denagaland.org.in))

The Department also encourages all colleges and schools offering Science Stream to actively participate in this career counselling event and extend the invitation to their students.

DATE	TIME	VENUE
6th July 2023	9:30AM - 5:00PM	Capital Convention Centre, Near New Civil Secretariat, Kohima
7th July 2023	9:30AM - 5:00PM	The Four Seasons, Kohima Road, New Police Commissioner Office, Dimapur

**Sd/-**  
**(ER.VIPULHOU LHOUNGU)**  
DIRECTOR



## DSO Kohima-i Taekwondo asayamung indang metetdaksü

**Dimapur, Chiteni/July 4 (TYO):** District Sports Association tem den longjemer District Sports Office Kohima aser Tseminyu nati July 14 aser 15 nü Under-14 Taekwondo Tournament (tetsür aser tebur) cum selection agitsü ayongzükba metetdaksüogo.

Asayamung dak sendakba nung DSO Kohima, Zhopovi Zecho-i sangdong ka ajanga

ashiba agi, iba asayamung nung takok angurtem taruba Under-14 Taekwondo Tournament under Catch Them Young nung Kohima & Tseminyu Districts tenung nungi asayatsü atema shimtsü ta ashi.

Under-14 Taekwondo Tournament ya IG Stadium Kohima nung July 20 aser 21 nü asayatsü. Maneni DSO Kohima-isa, asayamung nung shilem

agitsü jangraba asayartem dang form tem July 4 nü nungi tenzüka office mapang District Sports Office Kohima (IG Road near SCERT Office) nungi agizüksü metetdaksüogo.

Form benoktsü asoshi tatembangbuba anogoji July 10 asütsü. Osang tejangjaba agitsü asoshi iba number: 9774650020 nung tongteprateptsü asoshi DSO-isa metetdakja liasü.

## Chhangte & Kalyan nati India's Footballer of the Year naroküm angu



Lallianzuala Chhangte

Manisha Kalyan

**Chiteni/July 4, 2023 (Agencies):** 2022-23 season atema Lallianzuala Chhangte-i 2022-23 AIFF Men's Footballer of the Year award aser Manisha Kalyan-i AIFF Women's Footballer of the Year award nguogo.

Jeje Lalpekhlua-i 2016 küm iba naroküm agizükba sülen arishi küm 26 taina asayar Chhangte ya Mizoram nungi iba naroküm agizükba asayar tanabuba kümogo. Iba naroküm atema Chhangte-i Nandhakumar Sekar adser Naorem Mahesh Singh na ajateta liasü. Pa international season nung India tenung nungi 12 ben asayaogo aser iba mapang pai goal ana idaktsü aser assist ka süja liasü.

Mumbai City FC puri League Winners' Shield koka asayaba season nung Chhangte ya kanga tongtibang asayar ka liasü aser pa taoba season Indian Super League (ISL)

nung Mumbai pur asaya 22 prongla nung asayaogo. Pai goal 10 idaktsü aser assist trok süja liasü.

Taoba season sa Durand Cup asayaba mapang asaya tenet nung Chhangte-i goal tenet idaktsü aser assist asem süja liasü aser Super Cup nunga asaya asem nung pai goal ka idaktsü.

Kasa mapang nung arishi küm 21 tain Manisha-i, Dalima Chhibber aser Ngangbam Sweetie Devin na ajateta iba naroküm agizükogo. Punjab nung soa ainba football asayar yagi maneni kanga junga asaya arudar aser lai iba naroküm anabenbuba agizükogo. Kalyan-i taoba mapang 2020-21 AIFF Women's Emerging Footballer of the Year naroküm dena agizükogo.

Maneni 2022-23 season atema Akash Mishra nem AIFF Men's Emerging Player of the Year naroküm agütsüogo. Par

team asaya ter nung goal ka dang mechi-i asayaba nung Mishra-i tongtibang shilem agia liasü. Taoba season pa asaya 25 nung shilem agi aser goal ka idakja liasü.

Defence nung asayasang ya taoba season India team nungi terben asayaogo. Sandesh Jhingan aser Pritam Kotal nati iba naroküm agizükba sülen Mishra ya defender tem rongnung iba naroküm agizükba tasembuba asayar kümogo.

Arishi küm 16 tain Shilji Shaji nem AIFF Women's Emerging Player of the Year naroküm agütsüogo. Shaji ya India U-17 team nung züngsem ka lir aser 2023 SAFF U-17 Women's Championship nung lai goal ti idakja la goal timtba idaktsüba asayar liasü.

Clifford Miranda, shibai Odisha FC puri mezüngbuba takok marok anguba nung tongtibang shilem agia liasü pa nem AIFF's Men's Coach of the Year naroküm agüja liasü.

Josep Gombau-i mapa toktsüba sülen Miranda ya interim head coach asütsü shim aser pa lenisüba nung Odisha FC puri Super Cup akok aser AFC Cup atema qualify süa liasü.

Taoba India nunger international asayar aser India women's U17 team head coach Priya Parathi Valappil nem AIFF Women's Coach of the Year naroküm agütsüogo.

## Asian Youth Table Tennis atema India team sangdongogo

**Chiteni/July 4, 2023 (Agencies):** 27buba Asian Youth Table Tennis Championships nung shilem agitsü atema Mongolbarnü Indian table tennis squad nung asayar 14 shimogo. Iba asayamung ya Doha nung July 17 nungi 22 tashi asayatsü.

Team nung tetsür tenet aser tebur tenet densema lir.

Asayar shimertemi rankings dak ajemdaker tetsür aser tebur section nung Under-19 aser Under-15 squad shima liasü. Parnok meina coach asem aser supprt staff ana aotsü. Team ya July 16 nü Qatar-i aotsü.

Doha championships ya November 23 nungi December 3 tashi Nova Garcia, Slovenia

nung asayatsü aliba 2023 ITTF World Youth Championships atema qualification asayamung ka asütsü.

Iba continental asayamung nung U-19 aser U-15 tetsür aser tebur asaya nung takok angurtem Slovenia nung asayamung atema indang indang shimtsü, saka India nunger asayartemi section ana nung spot trokrok aliba nungi kabosa angutsü merangtsü.

India nunger asayartem taoba küm Tunisia nung iba asayamung atemabo qualify süa liasü, kong kija, tarep aser team event liasü.

Taoba küm Laos nung Asian Juniors asayaba mapang India U-19 teburtemi bronze medal

angu aser Doha championships atema qualify süa liasü aser tetsürtem May ita Itanagar, Arunachal Pradesh nung Doha atema qualification event nung temaba jenjang nung tembanga liasü.

**India team nung asayartem: Boys:** Ankur Bhattacharjee, Divyan Srivastava, Jash Modi, P.B. Abhinand, Sarth Mishra, Punit Biswas and Priyanuj Bhattacharyya.

**Girls:** Yashaswini Ghorpade, Suhana Saini, Jennifer Varghese, Taneesha Kotecha, Avisha Karmakar, Sayanika Maji and Sayali Wani.

**Coaches:** Anindita Chakraborty, Jay Modak and R. Rajesh.

## Al-Ettifaq manager asütsü Steven Gerrard shimogo



**Chiteni/July 4, 2023**

**(Agencies):** Saudi Pro League club Al-Ettifaq head coach mapa abentsü atema Steven Gerrard-i mulunga agizükogo. Pai iba maongka agütsüba ya taoba itabo magizüki liasü.

Al-Ettifaq-i taoba ita Gerrard jaoka parnoki pa nem agütsütsü aliba maongkatem sayua liasü. Ajisüaka maongkatem reprangdanga asadangba sülen pai media dang pa club nung adentsü renema mali ta ashi. Gerrard-i, "maongkatem raprangdangtsü atema ni jaok aser ni reprangdanga liasü. Ni taoba anogo ishika iba maongka asadangogo, saka tangbo iba maongka ya magitsü," ta ashi.

Tawa Al-Ettifaq delegate temi England semdanga Gerrard den sensaksemshia liasü aser takok ngutetogo, kechiyong Saudi Pro League club yagi taoba Liverpool midfielder aser taoba Rangers manager ya parnok club indang coach tasenba asütsü shimba sangdongogo. Pa den Hombarnü küm ana atema tenanzüktepbba yangluogo.

Club tir Khalid Al-Dabal-i iba tenanzüktepbba ya Saudi Pro League nung nungtugutiba rongnung ka lir ta ashi.

Gerrard lenisüba nung Rangers puri küm 10 sülen 2021 küm mezüngbuba Scottish title bena liasü. Iba sülen pa Aston Villa-i ao ajisüaka October ita mapa nungi anentsü.

Al-Ettifaq-isa, taoba EBFC, NEUFC aser KBFC head coach Eelco Schattorie, Sporting Director asütsü shimogo.

Dammam nung amendaker aliba club ya taoba season Saudi Pro League nung 7buba nung tembanga liasü. Taoba season league koker aliba team yagi Karim Benzema, N'Golo Kante aser Kalidou Koulibaly nunger amala asayartem alizükogo, anungji taruba season title atema tokteptsü asoshi parnok amala asayartem atsüa arutsü atema Gerrard asoshi tenongshiba ka asütsü.

Osang ajanga ashiba agi, Gerrard-i, Jordan Henderson aser Philippe Coutinho na anir arutsü asoshi merangdar.

## Turkey aser Egypt tesendaktep... (Tapak 7 nungi...)

Linük ana nungi foreign ministry ketdangsur tejentem 2021 küm nungi sensaksema arudar aser 2022 küm Qatar nung World Cup asayaba mapang Sisi aser Erdogan na ajurutepa salemtpeba sülen Turkey aser Egypt na tesendaktep nung tongtibang jenjang ka agia liasü.

Linük ana tsünga 2023 küm ministerial jenjang nung aiben sensaksemogo aser iba den osang tajung belentep tenzüka aser tesendaktep tanaben amenokshitsü atema yimjak nung sensaksem tenzüka liasü.

Cairo den sensaksem tenzüksüba ya tang regional tashitem den tesendaktep raksar aliba yanglushitsü atema Ankara indang foreign policy nung shilem ka lir. Parnoki Egypt den külemi United Arab

Emirates, Israel aser Saudi Arabia dena tensendaktep yanglushitsü atema sensaksem dar.

Ankara aser Cairo na tsünga Gulf ken o aser iba den bendenloksema eastern Mediterranean nung hydrocarbon resources lemsatepbba, Libya nung mangetettep aser Syria rara dak sendakba nung opang mepui aruogo.

Saudi Arabia, United Arab Emirates, Bahrain aser Egypt-i 2017 küm June ita Doha den tesendaktep mayutsü atema telemteba agiba sülen Turkey-i Qatar pusema liasü.

Iba sülen Arab linük pezü den tanga linüktem aikati tzüym, ali aser anung nung Qatar nem tenokdangba agütsü aser ashiba agi Doha-i kiralongrartem busemer.

## BILEMDANGANG

"Nisung ajak nükjidong kaka yur alimai yok."